

擘經室集

擘經室續集卷七

文選樓詩存第十四

丙戌

男福注

丙戌春余爲粵西閱兵之行六月移節滇黔九月到滇十二月復有開化閱兵之行是年水陸行一萬數千里得詩數十首爲一卷錄寄揚州題曰萬里集

漱珠岡萬松山上建漢楊子祠

舊聞丁卯許家詩南海雪飛東漢時五鬣長松今萬

樹我來應建孝元祠

楊孚漢議郎嶺南學人之最古者

焚香

嶺氣已鬱蒸海氣復鹹濕城居嶺海間那不愁厭浥
况是春氣早細雨洩雲汁久坐尙無聞所苦出復入
拂茵醖已浮攬衣腥更襲年來脚受病頗困行與立
礎蒸脛同潤簾霧鼻惡吸快撥薰爐來蒸炭呼火急
海南香尙多價賤用易給速結初試拈沈水亦可拾
斑輕飛鷓鴣涎重起龍蟄遂使一室中燥氣滿相裒
且讀葉香譜莫繙脚氣集

自陽朔溯桂林再題陽朔奇峰圖卷

九曲灘如折坂登灘江山勢又峻嶒夜來增造萬千
級西去城增十二層員嶠方壺隨地起側峰橫嶺向

空凌荆關董巨多名筆如此離奇彼未曾

粵西舟次題周夢巖學使評梅山館圖

周編修作楫江

西泰和人
小門生

山館超然遠俗塵翰林且置畫中身要知疎野高閒趣纔是清華貴重人花在故鄉思快閣

泰和有快閣見黃山谷詩

圖隨官舫過昭津

平樂有昭津

林泉鼎鼐休誇說儘把寒

香詠好春

題潘紅茶封使富良江使槎圖

越南列藩服接粵西南陲江山旣修阻人物亦安熙
嗣王新襲位請

命國乃治

帝錫以

誥敕天書煥文詞皇皇

天使節特

命潘公

恭辰廣西按察使

持浮槎富良江嗣王肅威儀

恩波沐浩蕩雲樹增華滋憶昔卅年前新阮

謂光平入

覲時華髮被繡服我曾及見知

乾隆間阮光平入覲大人曾見知之

其子

謂光

益不肖其臣盜乃爲連年入閩浙擊伐勞

我師庚申夏六月我乘風擊之船盜全喪失其國遂

更衰

光續昏庸益甚其巡海總兵四員駕船破來閩浙爲盜嘉慶初年所謂艇匪是也嘉慶庚申六

月大人乘風縱兵擊之于浙海松門船盜沈溺死數
千人總兵四人溺死者二獲總兵倫貴利戮于杭總
兵耀斬于台餘皆就獲片帆無返者帝擲所
獲四總兵印文及敕以責光纘光纘上表謝罪其國
由此舊阮起農耐收復其舊基阮光平爲新阮今越
大衰舊阮氏時栽培與傾覆

帝德皆無私名藩列南服新政善創垂

嘉慶時舊阮滅光纘

帝卽封農耐舊阮名福映者爲越南國王今所封王乃舊阮王嗣子名福皎嗣王亦恭恪

請

命不敢遲沈沈潘使者說禮還敦詩文明耀桂海溫
肅兩得宜試看此圖內江水何瀾瀾一槎天上來南
極星辰披濃花復細雨待立滄海碑

桂林東郊耕藉田

粵西春比粵東遲，禁火餘寒入古祠。
石壁嵐光生翡翠，水田天影凍玻璃。
因知桂管催耕雨，也似江南布穀時。
好是農安邊徼靜，一郊新綠轉青旗。

沿紅水江至遷江縣宿東軒春月甚朗十年中
三宿于此皆見明月因題曰寓月軒

一江瀉紅浪，四山森翠微。
薄暮入巖邑，小駐停勞機。
行館正春暖，東軒猶夕霏。
茶盤雜藤茆，瓦盎香薔薇。
樹晚杜鵑響，廊暗蝙蝠飛。
清風甫移榻，皓月來款扉。
光迎粉壁滿，影入朱闌圍。
蠻中烟晦易，月色晴霽稀。

三度此寄宿徹夜皆清輝呼童舉書燭豪墨試一揮
行過遷江古之瘴鄉今雖瘴少然氣候殊不齊
非霧非烟山氣半晴半雨雲光風勢或凝或散天時
乍暖乍涼行過沙路石路間有草香藥香莫少莫多
茶飯勿單勿厚衣裳

閩邊

襲土州官靜守邊山猿耕讀亦安然

今斷藤峽內外
猿村全入保甲

爲民猿民
有讀書者由來

盛世恩威久遠勝前朝寇亂連細雨春波出藤峽閒
雲落日望思田如今若問岑家事拜職孤兒十六年

前明岑氏世代禍亂岑猛蘇受之事雖經陽明親定旋定旋亂今田州岑錦本遺腹孤兒十六歲大人題請襲職無爭者

啜茶

葉暗桃榔孔雀飛萬山潛蟄起春雷蠻江新漲綠如酒此水能無飲一杯

邕江舟中

邕州古巖疊據江以爲塹五管此最遙按部駐亦暫勾當軍事畢江船欲東帆論程尙逾千計月已盈三十萬大硯山兩岸排成礪參差誰位置玲龍匪雕塹絕似金錫鎔猝投寒水蘸遂使天工成不受人力欠

空洞能藏舟通罇亦繫纜巖怪心屢驚穴多目費瞰
屏列滴蒼翠深青或揚紺吾鄉得其一嗟者必泛濫
歎此奇峰多蠻荒自埋陷屈指古畫家未見亦可憾
歸途抵勝遊已足係思念况有木棉花千樹極紅豔
野廟鷓鴣啼深林苦竹暗落日西山平春風一江澹

得復初齋全集邕州舟中讀之卽寄野雲山人

我初聞蘇齋

翁公方綱

是聞凌氏說

凌氏仲子學于蘇齋乙巳丙午間在揚州

及我入翰林公秉學使節山東我代公

大人授山東學政接公任

石帆亭上別居杭又數年公詩自緝綴寄來前數集

刊校始于浙刊成度靈隱書藏由此設兩家詩卷中

言此頗親切我重入翰林此事遂中輟蔣氏來嶺南

後集續刻鏤

礪堂相國爲公門生督粵時又刻其後集

六十有六卷十七

集臚列暮年續一集四卷李所擷

公小門生李彥章又刻其末集四卷

去年洛陽紙棕墨新印刷於是復初齋詩乃全無缺

書藏與朝鮮寄去情勿竭憶昔庚辛間袂與野雲挈

紅塵足不到常向蘇齋謁談經兼論詩金石緣亦結

石墨書樓中摩挲遍碑碣有時坐詩境清言落玉屑

有時石畫軒山雲贈怡悅東郊古寺遊拈花聽僧偈

壬秋潞水詩柳向亦園折丙冬復相見暖室畏寒雪

爾時公漸衰則亦嗟大耋公遽歸峨嵋遺集今悲閱

集中惠我詩一字不減十卷金石錄小印爲我剏

欽州竟無書詩筆從此絕

大人以宋鑿金石錄十卷寄公題識公作詩並刻寄

小印且云欽州魚山馮氏家有全帙可借摹刻之訪於欽州無此書公此詩後祇有銅尺詩一首遂絕筆

好古久同心敢比老彭竊蠻江春夜船老眼一鐙瞥

祭馬伏波將軍廟畢放船下橫州大烏灘

百里奔流抱山轉山麓磯頭抗神殿
棉紅榕綠江春深溪澗香毛鼓鐘薦羣舟
敲鉦齊下灘架櫂挾篙如待戰怪石如林堆
水面水與石爭浪花濺灘底埋山不可見惟見
沸騰亂渦淀灘師昂然坐船頭指點從容色不
變四時水石猜高低總避石鋒尋水線櫓枝

一撥柁振鳴折出龍門

灘下石隙之名

激如箭水強舟弱舟

自搖搖動篷窗作寒顫津吏送我似目愁我喜下瀨

飛橈便灘遙石盡春江平躍鯉猶驚掠波燕

廟中藏伏波將

軍小印伏波不止馬一人但印則真漢物也

潯州道中

鷓鴣天氣半晴陰野路荒江取次吟新漲綠齊芳草
岸夕陽紅助木棉林雲歸蠻洞開還合春入徭邨淺
復深差比陽明多逸興思田行過又邕潯

過端州羚羊硯石峽

千里青山百道舟合流一峽在端州會齊萬派清泉

眼潤透三巖膩石頭靈障磨開天不惜慧根鑿破爾
應愁羚羊有角成何迹莫向詩禪捉摸求

三月晦日立夏節過端溪

木棉花過看桐華

潯州滿岸木棉
梧州滿山桐花

一路桐華看到家

萬疊青山千折水好春才去卽天涯

定靜堂前手種荔支今夏結子頗多積雨甚涼
甘漿欲進學白沙就樹噉荔法噉之

東堂栽荔已三年雨後甘漿曉最鮮就樹噉鮮原有
法不妨竟學荔支仙

那堪七日馬鞍馱一日離枝變已多如此須臾真不

離色香與味問如何

奉

命移節滇黔濱行拜 天后宮

自我領封疆初出卽籌海浙粵東復南于今十七載
目覩鯨波平扶桑發暈彩交南與泰西

國威動真宰至誠雖感神自懼晚節改頓首湄洲宮
庶幾寡尤悔

檢書

十載居嶺南積書數十架茲爲南詔行安得全棄卸
戚友可以別此事豈能罷損之又損之已勞四牡駕

兒曹復好事豐碑載泰華

余請篋雙碑以行

滇池雖控夷內

政頗清暇正宜理陳編青鐙坐清夜思書若無書未免動嗟訝彼鮮藏書家一額安所借琴鶴欲相隨莞爾可辭謝

劉樸石

彬華

何湘文

南鈺

謝里甫

蘭生

胡香海

張棠村

業南

李繡子

黼平

諸書院院長暨學

海堂學博生徒皆有圖詠送別題荅一律

幾年嶺表慮先深得暇纔遊儒士林講學是非須實事讀書愚智在虛心汲投淵海古修綆氣盛衣冠朋合簪此後懷人各何所半看圖詠半登臨

別醫者范素菴

清

四年病脚氣兩足殊支離豈無千金藥豈無三世醫
柰此濕與熱兼之勞且衰不劇已爲幸安能有痊期
君思念老臣移節居滇池彼間不寒暑貂葛無所施
彼間不卑濕高燥如京師卽使自乞郡亦惟此地宜
范氏送我行遠過端江涯爲言相別後當是去病時

避暑

路出蒼梧中節氣過大暑川途已苦熱况復日當午
近岸得茂林籬落成小圃修竹高逾樓老柚密如戶
可識綠陰中幽翳勝棟宇願涼風暫清計日暑將處